

然犀錄

中冊



商務印書館印行

然犀錄卷中

肅順伏誅後降乩

同治初、表兄樊少蓉扶鸞於京師。乩忽奮迅大書曰。剛在市口吃一刀。大駭。急毀其乩。是日肅順伏法。無別囚也。

端華顯靈

端華賜自盡死數年矣。其守墓者。於薄暮時。見端冠窩兔冠。披猗猗孫袍。盤膝坐墓前石臺上。大駭返走。端招手呼之曰。汝我家世僕也。尙畏我乎。傳語諸郎。我已赦罪。仍在先皇御前當差。無苦也。有一事未了。故來。卽於懷中出紙一束。授之曰。可囑若輩依我語好爲之。勿謂我不常來。便高閣不辨也。語畢。欻然滅跡。其紙似紅牋。已暗敝。墨跡甚淡。細審始可辨識。讀畢。字亦滅矣。其子初疑守墓者妄言。後見其書。與其生前手書無異。所囑之事。亦非守墓者所知。始深信

之。常舉以告人。特不肯言所囑者何事耳。

乩仙

大梁撫署西偏。有隙地數畝。稍有花石。顏之曰偶園。先兄彥奇葺曲室三楹。集幕中諸子。設乩召仙於其中。其常至者。本署大仙老狐也。自稱爲焦初秉。得道於北宋。不言休咎。不爲詩歌。惟勸人爲善。其言往復諄切。响响如老嫗。同人皆厭苦之。一爲陳鍊伯大仙。明季殉難。歿爲巡河使者。喜爲詩詞。多慷慨激烈之音。時幕中諸子爲邵玉樵太守。樊少溶刺史。朱用之別駕。宓愛棠王蔗鄉鄰心農康麥生四大令。鈕荔生貳尹。孔鳳五孝廉。或至或否。不必全集也。一日。甫降乩。卽大書一詩曰。召伯甘棠。彥侯擁盾才。彈琴令尹至。載酒謫仙來。斫地悲歌壯。談天口角詼。君魚脂不染。翁子志休頽。樂府康郎咏。吳觚鈕氏裁。愧余無傑思。俚語只堪哈。一人用一事。諸子亦恰於是夕俱在座。可謂奇矣。鈕氏無別典。惟鈕玉樵有觚賸一書。然書出於國初。仙竟見之。倘亦如紀文達所記蘇小

能爲七律之說乎。衆訝翁子志休頹句非吉語。未幾用之竟以心疾卒。一日，乩作楷書。體勢秀媚。自稱小霞嶺使者。女仙也。詩如其書。間有幽怨語。不能盡明。作下壇詩已。忽書曰。蘭貞屬相傳語。衆瞠不解。蘭貞爲何許人。荔生變色。蓋其亡夫人王氏小字也。乩續書曰。昨相見。屬語公子。如續鸞膠。卽吳勝角車中所見可矣。鉅憶前數日。果於吳勝角遇一女甚美。初未以語人也。因乩言訪之。乃大興陳太守次女。年十九。未字。遂託人爲媒。一說而就。亦異事也。每召仙必於夜靜時。一日甫下春。蔗鄉偶至是園。見乩盤未撤。戲以手扶之。竟旋轉成七絕一首。末云。可畏檐前一雀來。注云。雀者。爵也。蔗鄉不解所謂。乩又書曰。謹防火災。蔗鄉大懼。以爲其寓火也。未幾。先大夫簽押房一僕夜出。掀簾拂燈。煤落畫軸上。火遂上延。呼救不及。燒所藏書畫都盡。公牘獨無恙。燈煤所熟。則改七癖所作晉爵圖也。恰挂後簷云。此亦陳鍊伯大仙所預告。其詩詞曾鈔一帙。藏先兄處。今不知尙存否。

湖州史案因果

國初湖州有富人莊廷鑑者。老而瞽。聞左邱失明。厥有國語之說。以重貲購得。其鄉明故相朱氏明史稿一部。延四方績學之士。開館於家。補完刊刻。冒爲己作。當時名士如顧亭林查伊璜輩。多鄙其爲人。且以其書語多狂悖。不應其聘。莊猶列其名於纂脩之列。以爲重。前歸安令某向莊借貸不遂。乃上其書於朝。致興大獄。時廷鑑已死。詔戮其屍。子孫髻鬣皆斬。名士多被累者。顧查力辨得釋。此事屢見記載矣。吾友吳紫珊大令云。廷鑑父業操舟。有某官宦成歸里。攜眷乘其舟。行裝外有油篋數十事。謂其鄉油值甚昂。載此可博重息也。一日。莊下艚貯貨。觸一篋破。油出而篋不爲輕。異而探之。則有黃金巨錠在焉。又啓一篋。亦如之。莊卽泊舟僻處。殺其全家。拋屍於江。而盡取其金。遂成巨富。其弟廷鉞生時。未命名。其父夢一神人謂之曰。曷不以廷鉞名之。其父喜。謂神人命名。子必大貴。至是始悟其應受朝廷斧鉞之誅也。此事初無知者。莊誅後。其老僕

乃稍稍泄之云。

鬼藏袴

閩督署上房西偏一院。有室五楹。向無人居。院中假山。數峰映帶。林木頗有畫意。予喜其幽潔。乃冀除居之。儘西一室。暗不見日。乃扃而加鍵。以書架蔽之。設長案於前。背之而坐。案南抵窗下。北至榻前。中間止容人過。甲戌七月十四日夜。熱甚。予獨宿其中。頗覺涼爽。時將四鼓。甫登榻。恍覺門啟。架移。一人自內室奔出。涼風肅然。掠榻前。衝外戶而去。榻旁几上置蚊香艾火。風過處。爲之驟明。心訝之。以爲目熒也。次日復然。第三日。於登榻時。特注目不少瞬。甫覺案移。急探半身阻其去路。其人甫出。卽僵立案前不動。雖燈火已滅。而窗上月色甚明。正見一人向窗側立。不見面目。頂上似有椎髻。餘髮倒披於下。衣灰色。兩肩甚削。似以一木支撐而立者。狀甚可怖。予探身久。倦甚。甫一轉側。再視之。無覩矣。予向着一繭絲袴而眠。晨起失之。遍覓不得。已而於牀架上得之。摺疊完好。蓋

警予使去也。予卽移居他室。竟不知是何怪也。

葉縣店中女鬼

河南候補知縣有馮老海者。忘其名。年六十餘矣。赴葉縣出差。縣前一店。便往投止。時甫加申。內室暗不見日。卽宿外榻。僕方解裝。老海卽內室門外椅上坐而吸烟。神倦欲眠。甫一交睫。恍覺一婦自內室奔出。蓬髮麻面。脂粉狼藉。着綠襖紅袴。斗向其身上一撲。便覺已與交合。精如湧泉。急睜目。婦驚入室去。心疑是夢。未以爲異。方欲上牀。婦又一撲而遺。乃大驚呼僕。卽夕移居。後知此店爲胥役所開。前數日有犯奸婦自縊於內室云。

鬼索債操山西語

金陵副都統某僕夜如廁。欲還。見一藍袍人當門阻。以爲同伴戲之也。揮之使去。其人曰。某非人。乃鬼也。某大驚欲號。鬼以手扼其吭。曰。負我見大人。便無汝事。否則扼殺汝。某懼而負之。殊不覺重。都統方與其妾坐談。見某大詫。方欲呵

問。某忽作山西人聲。口曰。爾非咱無以有今日。一旦富貴。竟不認識咱了。可憐咱千里遠來。不與一見。還要驅逐咱出境。致氣死店中。不與棺殮。也還罷了。怎麼一串黃錢。也不與咱燒燒。一杯燒酒。也不與咱喝喝。我要到陰司告你。償我命來。都統心知某爲冤魂所附。便喝令家僮用馬鞭擊之。某大叫曰。打得好。打得好。咱猶念交情。不來告你。你今不追悔。還如此仗勢打人。咱便去告你。明日再見。其妾知其事。在旁苦勸。並爲焚楮幣跪求恕免。某曰。姨太太是好人。若大人如此看待。咱便沒的說。現在咱也顧不得許多了。要打官司。要打官司。言畢。倒地氣絕。久之始甦。云負鬼時。實欲負之出外。不覺竟至上房。其後事。瞢然不知。惟痛楚難禁耳。明日下午。都統令親兵執槍環之。並使人繫某於室。禁不得出。至二鼓。其乳嫗忽倒地。口吐白沫。跪其妾前。曰。謝姨太太費心。可惜未寫我名。錢都被南蠻子搶去了。土地也拿去不少。咱無憑據。不能爭執。好在我狀已告准。不需費用。即刻要過堂了。都統方喝打未絕。忽謂其妾曰。差役果來。取我

衣冠來。已而手作撐拒狀。遽仆地死矣。時許仙屏丈爲布政使。憫其到任甫三月卽死。屬首縣爲經紀其喪。並捐俸助其家人。蓋某爲筆帖式時。窘甚。有山西票莊某夥與交善。時時助以貲。十餘年累數千金。某不能償。夥又移他款代償之。旣某放外官。夥往索。仍不還。事爲莊主所知。逐夥出號。自此無衣食計。某升蒞金陵。夥自京來見。求一噉飯地。某絕不爲通。遂抑鬱死。不料其鬼靈異乃爾。書之以爲負心者戒。

清河冤鬼

陸緝卿表弟言其客直隸清河某令幕。接印日。甫移入署。晚飯後。與同事五人聚談一室。僕輩伺於外間。時約三鼓。忽聞外戶門啓。僕輩噉然而仆。旋見門簾颺起。一人驀入。垢面蓬頭。瞪目流血。渾身泥汗。雜以刀痕重疊。血跡模糊。陰風颯然。燈光慘綠。六人爲陰氣所襲。俱陰喝不能出語。其人向六人面目俛身細看。良久始出戶去。燈光復明。衆始能語。問僕輩所見相同。方共怪詫欲呼胥役。

其人又來。復至六人前。仍如前細視其面始去。衆大驚呼。令出告之。令快手執槍環伺。至曉始罷。後知此室爲前令司刑名幕友某所居。所辦案必有冤抑。冤魂殆爲覓某來也。時某已解館歸家。甫行一日。遽斃於車中云。

忠魂戲嬰

予友傅子儒太守。兒時與兄弟讀書於東昌鄧氏。屋後有樓五楹。猶前明遺築也。塵封蛛網。久無人居。其下湫隘不見天日。門本加鍵。年久鎖蝕將斷。主人不知也。其兄弟散學後。將鎖扭斷而入。突見室內有無數小兒。自地鑽出。止見其頭。兩目睜睜。視衆而笑。子儒兄弟皆幼。卽亦不懼。戲溺其頭。隨溺隨滅。倏忽無覩。仰視樓上。有古衣冠者四五人。有白鬚者。有黑鬚者。或紅袍。或藍袍。俱紗帽。秉笏。撫闌而立。羣兒以瓦礫擲之。不動。但微笑。或僞作怒容嚇之而已。如此者月餘。一日。塾師他出。羣兒方自樓下戲罷歸塾。忽聞身後履聲橐橐。回視則古衣冠者接踵潛步而來。遽登師座。取夏楚擊桌有聲。若責兒輩之荒嬉者。羣兒

笑之。聞塾師將至。倏忽不見。其笑貌悉與人同。但不言耳。又一日。有客來訪塾師。譽其詩文。師謙曰。幸勿面諛。兒輩不解面諛二字作何解。以爲麵魚也。每共語以爲笑。語方畢。門外亦屢呼麵魚。麵魚不已。隔窗視之。則古衣冠人也。自此始聞其聲云。中秋分得棗脯。戲供樓前。至晚俱不見。明日學房窗上有雞蛋糕一包。視之與市肆所售無異。竟不知其何從得之。羣兒不敢食。晨起視之無覩矣。後爲主人所知。重加鍵鎖。乃不復來。據主人云。明季有布政左參議。偕其友某官殉難於此。蓋忠魂不散。偶出遊戲云。

烟鬼以膿血作膏強人吸

洛陽朱秀成寓省城北土街忠升店。晚飯後。方欲吸烟。忽見一藍衣人與之對臥。謂是同寓客也。問其名姓。其人方呵欠不答。乃讓烟使吸。盡三筒而去。明日復來。又盡三筒。掉頭竟去。朱訝其無禮。明日又來。朱曰。君旣同嗜。曷不攜烟來。俾我一嘗乎。其人頷之。約三更許。果持一牛角盒來。啓之。中貯紅白粘汁。殊不

似烟。朱曰。此是何物。那可吸。其人乃掀起前襟。露胸示之。乃一瘡。大如盞。肌肉潰爛。膿血淋漓。朱大驚。以烟槍擊之。應手而滅。呼主人問之。店中殊無此人。盒則主人之物。所貯之汁。似膿血而非。臭不可近云。

烟鬼無下頰

汝州署前烟肆。主人夜半熬烟甫就。突見數人排闥直入。爭奪其烟。主人驚視。其人皆無下頰。心知是鬼。方欲號救。衆推之。仆於爐炭。卽昏迷不省人事。其妻聞臭起視。則半體焦矣。臨榆李子錚先生時爲州牧。親來驗視。肆主人尙能自言所見。未幾竟死。先生素不信鬼。亦以爲奇。爲之通詳。並牒城隍。爲捉鬼報冤云。

夢遊

予大舅氏容齋公居京師。道光末。先外祖自江寧府擢淮揚道。尙未到任。公欲往省視。未果也。一夜夢一役來曰。淮揚道前任已去。道署正加丹墀。盍往一觀。

公曰。遠在京師。那便遽至。役曰。但請同行。卽刻至矣。公不覺隨之出。稍一曲折。見道北一署。役曰。至矣。卽導以入。穿儀門。歷大堂。隨入客廳。院有丹桂二株。方盛開。廳事上懸木鐫楹聯。爲某某書。字勢雄偉。詞亦爾雅。讀之成誦。上房院亦有桂二株。正花。東偏一園。竹石嶽崎。環以曲沼。徘徊久之。其餘庖溷之所。無不周歷。恰未逢一人。遊畢欲出。役曰。園西一門。啓之可達於外。無事再從大堂行矣。役卽啓門。門外乃一演武廳。廳後一土地祠。殘香猶爇。賸楮半灰。役導從廳南一門出。徑至街市。役送至寓而去。醒而異之。筆之於冊。此八月事也。九月至署。見門屏屋舍。歷歷如夢。廳事楹聯。詞與書俱絲毫不爽。惟桂花已零落殆盡耳。於是屏去導者。儼如舊遊。家人怪之。遂歷指庖溷所在。並相符合。惟言西園外有門。達於演武廳。則非。問之園叟云。牆上本有一門。平日扃鎖。月望較射時始一啓。外祖到任後。以與上房密邇。新加壘斷。而塗墍其外。故不可見耳。其入夢時。門猶在也。旣由署外至演武廳。卽土地祠亦宛然在焉。出其筆記。與人觀

之。共相駭詫。此役胡來。此事胡關休咎。而先示其兆何也。

樊少容夢遊

表兄樊少容。少美風姿。同治庚午。秋試出闈。倦矣。晚飯後。和衣臥於外榻。見一叟。折言曰。姑娘命老奴接大爺。已以馬來矣。樊時曠一妓。名翮雲。以爲必其所使。卽出門上馬。叟捉鞵導之以行。樊時寓彰儀門大街。覺所行殊曲折。時皓月當空。無須燈燭。俄聞蘭若鐘聲。心知去廣惠寺不遠矣。良久至一茅宇前。叟叩馬曰。至矣。旋見一婢啓門出。迓衣紫半臂。俏麗絕倫。含笑言曰。適與姑娘正談道。大爺來大好。隨導入一便坐。几案外殊無餘物。婢曰。請少坐。儂請姑娘來。俄聞蘭麝噴溢。婢捧一女子來。含羞低首。容華若仙。見樊無語。但手弄裙帶而已。樊訝之。意殊不在翮雲矣。婢笑曰。便請姑娘房中去。千金一刻。勿久延也。遂攜兩人手。經小圃而西。始達圍闥。亦整潔無餘物。但案上列茶具數事。婢爲女卸裝。並促樊上牀臥。爲下半帷。忽笑曰。客來半日。尙未烹茶。可笑人也。遂以茶

具去。須臾捧茶一杯。視之色微紅。有異香。樊飲其半。婢接杯後。卽引手。又下半帷。但聞帳鉤聲鏘然。自此後遂茫然不復省記。俄聞室外人聲甚謹。似相詬詈。旋見婦女五六人。洶洶而入。一老年高髻者。指樊罵曰。何物野奴。入人閨閣。不應打煞耶。樊攘臂曰。汝家請我來。老僕可證。寧我自來耶。中有一二十許婦人。亦風格。拉樊私語曰。大爺已占便宜行矣。又何必與若輩噉舌耶。因目視門而眉語之。樊卽趨出。馬已不見。彳亍出門。地殊坎坷。行數十武。隱隱猶聞女子啼聲也。時月已西斜。秋風甚厲。自覺冷氣侵肌。殆不可耐。始知衣短葛衫。赤足。跋履來也。遙見十許步外。一燈熒然。知是人家。便趨就之。乃甫一舉足。已踰窗而入於室矣。旁有一椅。卽坐其上。傍北壁。一榻。有男女相對臥。榻前一燈。作慘綠色。照見男女面。皆枯瘦。色若死灰。室內風沙颯颯。陰氣襲人。知是鬼境。大駭欲行。不意椅旁尙有一人。與之並坐。枯瘠更甚。儼似骷髏。幸三人皆似不見己者。急踰窗遁。時月爲鱗雲所掩。乍暗乍明。了不知路之南北。但見面前老樹侵雲。

彌望不盡。卽穿樹而行。跋涉良苦。久之。又聞鐘聲鏗然。陰念此是廣惠寺鐘聲。但寺前那得若許大樹耶。便尋鐘聲至寺。呼門無應者。至此始識路。踉蹌至家。聞院中柝聲已四下。呼更夫啓門。亦不應。怒甚。不覺已從門隙飄然而入。至廳事。見一人臥榻上。瞿然而寤。已遺精矣。始知向所歷皆夢境也。聞柝聲果四下。出見月影已斜。有雲鱗鱗。乍暗乍明。與夢境亦合。甚奇之。明日。試從廣惠寺旁覓其夢境。見禾稼十餘畝。高可蔽人。疑卽夢中所見大樹也。又二里許。一小園。園西有新墳。彷彿所遇。土人云。陳氏女新葬於此。遠近多叢塚。所見男女對臥之室。不知誰氏墓矣。樊自云。向不知有陳氏女。不知何以入夢。夢境歷歷。惟交歡時。恰不記憶。亦奇。時南皮相國方爲編脩。與交善。爲作秋夢記。古雅可誦。然不免有粉飾之詞。余所記雖鄙俚。皆實錄也。

河南撫署瑣記二則

余幼時隨侍先大夫於大梁撫署。同治庚午中秋。余偕弟東民在太子宮嬉戲。

署西偏有室，前後十楹，俗呼太子宮，其來舊矣，蓋猶前明之故稱也。忽見上房屋脊上有竈，重疊累起，高約五

尺，約略百餘，因風搖搖，勢欲墜落。急呼吾師孔鳳五先生及邵玉樵諸君子觀

之。約一炊許始滅。又一夕夜讀，散學時已三更。晦日無月，自武庫行至平台前。

署極西有室三楹，俗呼武庫，蓋貯兵之室也。

忽見太子宮後一紅丸陡起，直上半天，光華四射，燦爛

非常。乍上乍下，目爲之眩。時與陸君吾山同行，注目久之。俄聞孔生小鳳自後

來，詫曰：得非狐鍊丹乎？語畢不見。麟見亭河帥曾於大梁糧道署一見之，因繪

圖記於鴻雪因緣中，約略相似。

撫署上房，年久失修。同治末，先大夫捐俸脩之，拆視梁間，有字云：順治二年巡

撫閩興邦重修。

按慶陽府有元祐某年某官范純仁重修，以後人重公名乃鑄之於木，今猶存。

梁下得一死狐，僵而不

腐，扣之作金石聲，大如小貓，毛潔如玉，目光猶炯。識者謂是狐已得道，此其遺

蛻。余與東民弟戲爲文祭之，而葬於太子宮後。方脩上房，眷屬擬移居於敬事

堂。堂內文案所居也。堂五楹，東西廂各三楹，東廂窗下爲自太子宮武庫來往

必由之路。時文案諸君子已移居於外。眷屬未來。方加丹雘。空無人居。予偕兄弟及族戚子弟夜讀書於太子宮。一夜童奴五六人攜茶具往烹茶歸。而神色倉皇。茶具盡失。訝而問之。奴曰。方行至敬事堂。東廂忽倒。幾爲所壓。故懼而仆。致碎茶具云。予輩不信。以爲奴輩羣嬉碎器。懼責而妄言也。痛斥之。散學後。結伴往驗之。屋固無恙。方加訶責。突聞屋內有梁摧棟折之聲。勢將倒塌。乃相率逸歸。明日上學時過之。屋仍如故。至夜呼家丁十餘輩。執刀秉炬而往。甫登堦。忽聞室又崩摧。大聲驟發。震仆者數人。旋見磚瓦橫飛。灰塵滿院。衆俱驚退。外文案俱聞聲遣人來視時。殘磚斷甃。尙崩落不止。恐爲所擊。無敢前者。以爲屋真圯矣。明日觀之。室仍無恙。後聞之。更夫云。此室自無人居。渠每至此必聞之。不以爲異。眷屬移居之後。竟無此異。不知是何怪也。

碧雞神

康麥生先生客先大夫幕中時。夢至一廟。規模壯麗。尙未畢工。兩廊都無象設。

惟正殿一象。衣冠整肅。以黃紙蒙面。不知何神。問之廟祝。廟祝笑曰。將來自知。出見照壁上大書碧雞二字。醒而異之。後十餘年。爲脩武令。又夢至其處。碧雞二字。宛然在壁。廟祝出迎。曰。公來恰值畢工。神象可開光矣。卽導至殿上。揭開黃紙。令康視之。鬚眉面目。儼與己同。更無少異。訝而問之。廟祝指象曰。此公之象也。又指康曰。公彼之神也。康曰。吾生而未死。豈便成神。廟祝笑曰。生本無生死。亦非死。彼死。此生。何彼何此。一推而寤。予時遊百泉。正客先生署中。先生爲予述之。予素知其前夢。私謂先生其碧雞之神乎。其非吉乎。神告之矣。又一月而先生卒。先生爲合河望族。工詩古文詞。生而聰明正直。其歿爲神也宜矣。

狐女贈香囊

興縣康麥生。先生子。魯門孝廉。年六歲。隨其父寓居懷慶一宅。乃安邱劉松嵐觀察之故居也。後園有樓五楹。有狐據之。久無人居。一日正午。忽失孝廉所在。徧覓不得。家人惶懼。晡時始於樓下見之。自云。方在樓下嬉戲。忽見一美婢攜

之上樓。樓中陳設華麗。地衣皆錦繡。一中年婦。傍窗坐。高髻古妝。衣紗縠。戴翠翹。若優人所扮。宮娥狀。二女侍坐。並姝麗。衣飾略相似。牀上一女。年可十四五。較二女尤美。分髮作數十小辮。復總爲一。每節絡以明珠。寶璐燦若繁星。衣輕縞。元紗半臂。履鳳寫織。不盈指。見其來。喜甚。呼以小主人。翁攬之於懷。問以家何人。讀何書。亟譽其聰慧。中年婦嘆曰。吾家遂無此物。惟祝汝得佳婿。爲我生外孫。如此兒耳。二女皆笑。女面頰低首。不語。中年婦曰。勿作態。兒飢矣。可取果餌食之。女卽命婢取食物多種。置其前。多不知名。但識黃柑丹橘。亦非懷慶所有也。久之。中年婦謂女曰。人家盼兒久矣。可令歸。勿貪戲也。女乃解所佩香囊。爲繫於襟。命婢送至樓下而去。衆視其襟。果有紫紗香囊。式如葫蘆。似以一紗織成了。無鍼綫之跡。表裏通明。中若無物。而香氣馥郁。歷久不散。其家至今藏之。

曾文正公前身爲神蟒

湘鄉曾文正公門外。有古樹一株。老幹如龍。蔭蔽數晦。屋後清水一泓。大旱不涸。公降生之頃。天大雷雨。自是樹漸枯萎。池水亦乾。公生有癩疾。終日爬搔。坐處浮皮滿地。視之皆作鱗甲形。生平最惡雞毛。見雞毛帚輒舉體寒顫。必亟撒去乃已。病劇時。家人見巨蟒於廳事。紅鱗翹冠。蜿蜒屈蟠。幾滿一室。奔告於公。公但微笑。是夕。卽騎箕去。識者疑公爲神蟒後身。其後樹枯復榮。池水亦溢。或栖靈之所也。俗謂名人巨公。多由星精僧轉劫而來。考之傳說星精。申甫岳降。其說蓋不盡誣。

彭剛直公降妖

彭剛直公微時。爲清泉典肆夥。跣跣不事事。主人辭之。一日。家人告米罄。公貸諸友。友適亦斷炊。乃相率遨於市。過某富室門。聞有饒鉞梵唄之音。問之。乃富室女。爲妖所魅。方延僧道打唱也。

湖湘間病者延僧道誦經驅崇爲之打唱

公笑謂友曰。此奇貨可

居。晚飯有喫處矣。遂踵門求見主人。自云。能降妖魅。主人奇公狀貌。延之上坐。

公曰。竊聞女公子爲妖惑。敢問其狀。今幸遇某。可無事矣。主人曰。幸甚。息女年十七。平日刺繡自若也。一日。忽失所在。覓之得於磨室。裸而褻語。不可聞。自云見一金甲少年來。曰。吾愛汝。挾之上天。至一處。曰。天宮也。飲食服飾。果異人間。邇來顛愈甚。殆不識人。公仁之則生。否則死耳。語畢。涕淚長潛。公曰。止此乎。易與耳。請遣僧道去。速持酒肉食我。我法非飽餐洪醉固不驗。主人卽設酒食。公偕其友高坐大啖。肉盡數豆。引滿累數十觴。曰。可矣。便至闔闔。踰門叱曰。何物死魅。敢擾闔閤。老彭來矣。若不速去。行將剝爾皮。食爾肉。嚼爾骨。用掌心雷擊爾魂魄。女方婆婆作態。聞公叱罵。伏匿牀下。唧唧有聲。初。某飲食畢。卽欲逃。公拉之不得去。心忐忑。謂無驗。且受窘也。見妖畏公。卽大喝曰。爾旣畏罪。不叩頭乞命。伏匿何爲。女卽出。蒲伏公前。泣曰。幸天將赦我。卽去。不敢再肆擾矣。公曰。姑赦爾初犯。速去。速去。再來必擊殺汝。俄見一獾自女身下抱頭衝戶去。自是女安。問之。女曰。方昏瞽時。見金甲神立於戶外。聲如霹靂。回視金甲少年。已變

獸形。其唧唧聲曰。雷部天將來捉我。奈何奈何云。主人大喜。復設盛饌款之。酬以百金。公以其半與友。而以其半爲旅費。投曾文正大營。遂爲水師名將云。按公善畫梅。虬枝鐵幹。不爲江湖疎花冷蕊之習。晚爲兵部侍郎。巡閱長江。直聲震天下。每奉命按事四方。督撫提鎮。爲之股栗。况區區一獮。敢作螳臂之抗哉。謂爲雷部天將。誠哉其神也。

王中丞

謝夢愚侍御爲陰司刑官。所傳多奇異。一日。先兄彥奇先生在酒肆。聞其向人微語曰。日昨王補帆生魂已勾到矣。兄聞而異之。時先公方督閩。王爲巡撫。適奉命巡臺灣也。於家書中述其語。書到。王死已十餘日矣。計其死時。正謝云勾到之前一日也。蓋其生魂先入冥云。時臺灣未設巡撫。王奏請臺灣密邇日本。必須威望大員鎮撫之。請以總督駐臺。而不令先公知也。諭旨謂總督職任兼圻。勢不便。應令巡撫半年駐臺。半年駐閩。王得旨。大戚。求先公爲奏留。公笑曰。

公本欲我去。如有旨。我不憚行。今既命公去。自當遵旨。那可奏留。以取罪戾。且既畏風濤。何以奏請派我耶。王曰。公體氣素壯。不畏烟瘴。學生脆弱。去必死矣。言畢痛哭。公慰之曰。公且去。吾當奏請公速歸可也。乃謝而去。駐臺一月。先公果爲奏請得歸。至鹿耳門。舟不能行。須坐簣桶。值大風。激水入桶。悸而病。歸至城門而卒。

淫魔幻象

陸懋宗編脩爲陝西主考。一日睡起。忽見牀上有男女二人。裸體相抱。怪而叱之。應聲而滅。轉瞬間。屋壁几案間。無慮千萬。蠕蠕然皆是物也。大驚呼僕視之。了無所見。俄副考某公來。則袍服冠履間。亦皆是物。最可笑者。額間亦有男女四人。淫戲不休。眉目生動。栩栩欲生。儼然一幅仇十洲祕戲圖也。陸素方正。自念曾無隱慝。何致召此淫魔。乃爲文自訟。焚之。仍時有所見。半月後。始已。及出闈時。忽見堂前列二樞。數人衰絰而哭甚哀。問之他人。均無所見。自知不祥。俄

丁內艱。又數年而卒。陸祕其事。惟與其弟子王可莊太守黃仲弢學使言之。學使以語予云。

扁鵲治癰

同治初。先大夫以禮科給事中放常鎮道。行至彰德。癰生於腹。大如盎。滿腹盡腫。飲食不進。先兄自京往省。行至柏鄉。遇一道人。藍袍微鬚。儀觀甚偉。自云。將往彰德視李公疾。先兄以爲先大夫所延請也。邀與同宿。晨起而道士已行。異之。比至而先大夫已愈。云。前夕腫痛愈甚。昏瞶中見一藍衣道士。負劍而入。舉手爲禮。卽坐牀頭。以掌摩腹。甫一着手。卽覺涼氣一縷。沁入肺腑。神氣頓清。道士徐拔佩劍。欲施剖割。懼而止之。道士微笑。仍爲摩撫。方痛止欲眠。突覺劍已刺胸。大驚而寤。癰已潰矣。膿血盈盆。頓思飲食。比先兄至。已結痂矣。言其服飾狀貌。兩相符合。知爲遇仙。後知彰德。舊有十名醫祠。遂往謁謝。第四座爲扁鵲。藍袍負劍。白面微鬚。正與所見無異。乃知爲扁鵲來也。按扁鵲有二。一爲黃帝

時人。一見史記。有列傳。又名盧醫。亦名秦越人。此則六國時之扁鵲也。遂出貲屬安陽令鄭虎卿明府重脩其祠。復夢其來謝。乃着綠衣。其後詢之。明府果爲塑匠。易藍爲綠云。

病瘧二則

先大夫督閩日。病瘧甚劇。一夜瀕危。恍惚見鹵簿以華輿來迓。赴閩羅任。遂冠帶升輿而行。戈矛導前。旌旛擁後。儀衛甚盛。迥異人間。行久悶甚。前至一山。欲往延眺。乃屏去騶從。獨陟其巔。俛瞰城市。街衢歷歷如畫。忽見旌竿矗立。旗幟飄揚。悟爲督署。自念方奉命督閩。豈得擅離。視草間有小路。乃循之。歸署。自是病愈。又先大夫每覺不適。必夢先祖光祿公率數人。舁巨甕來。甕中滿貯清水。爲破腹洗濯肝胃。次日卽已。此次獨無夢。而閉目卽見先光祿公危坐牀前。直至病愈。始無覩云。

同治癸酉五月十五日。予夢一皂衣來曰。起起。藥叉王延汝矣。隨至一署。殊庫

隘。不似官府。皂衣先入。門外有石獅二。予踞其一。俄皂衣導王出。深目鉅鼻。鬚如蝟毛。以白布纏頭。高可二尺。下垂於肩。形狀可怖。隨指予謂皂衣曰。可領他喫飯去。皂衣卽導予至一敞屋中。陰霾暗濕。與馬廐無異。羅列白木几案數十事。約有廿餘人據案而食。其東南一桌。予弟東民在焉。予呼之曰。弟那得來。弟曰。頃有人謂藥叉王招飲。卽來耳。視其肴饌。止野蔬數盤。殊不豐腆。予覺腹飢。與弟各食少許。俄見族兄寶臣踉蹌來。曰。適聞人言。曰。此鴻門宴也。將非善地。予方錯愕。族兄已去。視坐客已漸稀。卽攜弟手出視。前門有邏者數十輩。幸廐傍有短垣可跨。乃踰垣而遁。時明月在天。照見官道。殊了了。循道狂奔。約行數里。忽聞鐘聲。尋至一蘭若。額書圓悟寺三字。大如箕。款署少穆林則徐書。月映金書。燦爛耀目。筆畫波磔。纖悉可辨。山門已扃。急叩之。一僧自角門出。予方欲求宿。僧搖手止予。卽導入方丈。主僧如八十許老人。眉覆其睫。端坐蒲團。余偕弟膜拜於前。僧開目曰。藥叉王大惡作劇。已黷尊公。復及兄等耶。彼行至矣。匿

吾座後。容善遣之。語甫畢。卽聞人語馬嘶。喧闐寺外。予及弟伏僧後。屏息聽之。俄見藥叉王率衆而入。僧與抗辨良久。初猶倔強。繼曰。看和尚面。姑小懲之。突見一巨手自座下入。攫弟去。予大號而寤。晨起上學。而東民夜半病作。昏不知人。予散學後。侍先大夫飯。緬述昨夢。時先大夫病瘧方已。聞之愀然曰。藥叉王其瘧鬼。汝弟其病瘧乎。予入視弟。問以有所夢否。弟瞠不解。但曰。可怕可怕而已。予復入塾。甫捉筆作書。斗覺背上寒氣一縷。直透胸膈。便覺舉體寒顫。四肢厥冷。亦昏瞶不省人事。旣醒。已在臥榻。蓋族兄昇予歸也。自此寒熱交作。嘔吐狼藉。與東民所苦無異。而族兄竟無恙。予與弟俱自五月十六日病瘧。至八月二十一日瘧止。又半月始能出戶。洵藥叉王之惡作劇矣。或曰。顓頊有不才子。歿爲瘧鬼。喜食不潔。但朱書顓頊王之神位在此八字於病榻。瘧卽立止。勝老杜子璋鬪饑之句遠甚。惜當時不聞。未一試之。藥叉王果爲顓頊之子。其稱王也宜矣。或曰。瘧與藥音微同。或稱瘧王而君誤聽也。倘其然與。

狐餽饅首重二十斤

京師棉花三條胡同李姓一宅。後院一室。有狐據之。家人習見。不爲異也。兒童戲自窗中擲瓦石擊之。隨即還擲。屢擲屢還。從不傷人。李鐵拐斜街有王三者。與李善。一夜三鼓。聞窗外有呼王三太爺者。問爲誰。曰。足下與李老爺善乎。僕託其字下。彼此交好有年。近其子與僕幼孫以擲瓦爲戲。倘有誤傷。兩俱不利。奉託勸止其子。勿再以此爲戲。並屬懸一黃布門簾於門。尤感盛德。不敢忘報。已而又曰。門簾用黃布。即可不必紬緞。多費錢也。王諾之。起視無人。素知李宅有狐。必狐所託。次日。詣李言之。勸買黃布門簾懸焉。夜聞院中有聲砢然。起視。乃一豆餽饅首。稱之重二十斤。

雷擊二則

卽墨于次荷別駕爲泉河廳官時。租一船。榜人高明。年五十餘。雄健善啖。云是革弁。有兩妻。長者二十餘。少者年才十七。俱姝麗。且眉目態度甚相似。以爲必

姊妹也。問之非是。一日于出巡繖山湖畢。艤舟柳下。天將薄暮。夕陽在山。高負手步於岸上。忽雨滴船蓬。聲如撒菽。船人呼高曰。雨至矣。高卽飛步上船。時于方與汛官對坐。忽聞大震一聲。茶盜爲裂。汛官變色曰。水寇發礮矣。可若何。蓋湖中時有伏莽竊發也。語未畢。突聞船人駭詫聲。急出問之。見高明倒於船頭。徧身碧火熒然。旋滅旋起。硫黃之氣刺鼻。始知高爲雷擊。適所聞者雷聲。非礮聲也。急滅其火。則斃矣。身如塗漆。背上有硃書若篆籀。不可識。隨舁於岸側。令其兩妻守之。爲備棺殮。視兩人殊無戚容。少者且喃喃若詛咒。大訝之。已而明月滿湖。雨竟不作。于坐鷁首乘涼。聞船人竊語曰。頃見高被擊。始知報應之速。而天道之可畏也。于以其語有因。問之不言。固詰之。始肯言也。此船本屬魏叟。叟有二女。卽高之二妻也。高爲葦蕩營守備時。以爲坐船。一日逼淫其長女。叟怒欲訟之。明日而叟死矣。家無人。船人雖知其寃。畏高凶悍。無敢言者。船遂爲高有。而妻其女。俄高以不謹革職。遂以船爲家。時其次女尙幼。已許字某藥肆。

及長。高又逼之。女以有壻家。誓不允。高呼某來。時周濟之。並許嫁贖。近某來告吉期。高飲之酒。某歸。患腹痛死。家亦無人。無敢言其死之不明者。高遂以爲小妻。此上月事也。高有無他罪。不敢知。此則某所親見者。信報應之速。而天道之可畏也。予時承乏東河河防局次。荷以書來言之如此。此光緒辛卯七月初八日事。

嘉善周勉民廉訪家居時。有樓臨曠野。下俛山溪。一日晨起。天微雨。啓窗憑眺。遙見兩人自溪次登岸。手中似各有所持。行甫數武。俱跪於地。突聞巨霆一震。二人俱倒。電火繞身。碧焰閃爍。良久始滅。周率家人往觀之。一人渾身枯黑而斃。其一半體已焦。尙能言。自云名王七。與死者張胡頭。俱以糞船爲業。頃掉船至某家後門。門啓。一中年婦攜少女並衣物出。謂我兩人曰。吾女有孕。其父欲置之死地。吾不忍其死。以屬君等。無妻者。卽妻之。否則賣之。但求留其一命足矣。衣物以爲酬謝。語畢。叩頭痛哭而去。吾等攜女至溪下。俱欲得妻。且涎其物。

爭競不休。乃輪姦而沉之於溪。頃平分衣物。欲售於市。不料雷之有靈也。言畢亦死。視所攜衣數事。銀二錠。約重八兩。許遣人尋溪中。果有女屍在焉。乃以衣爲殮。易銀買棺葬之。

雷公

鈕嘯琴丈令齊東時。一日天微雨。方坐堂皇。忽一物自空而墜。援首鸚身。鷓鴣雞足。脇下雙翅如蝙蝠。兩目閃灼。金光射人。墜地卽鼓翼欲飛。而不及尋丈輒墜。但盤旋不已。吻中嘖嘖有聲。胥役皆駭走。是時雷聲砰訇。繞堂而轉。丈危坐觀之。知是雷神。忽見其頂上有毡帽一事。破爛汗穢。類貧人所戴者。陰念神或爲此物所汗。故不能奮飛乎。命胥役去之。皆謝曰。不敢。公乃自以長竿挑去之。突聞雷聲大震。猛雨如繩。物奮身一躍。展翅如鵬。倏忽已至雲中。轉瞬不見。按雷公被汗墜地。或爲產婦所觸。或爲妖術所欺。亦屢見紀載。此帽果誰爲戴之乎。丈嘗語人云。非某親見。雖伯夷語余不信也。且觀其手中所持。果有物如椎

云。

紙灰鬼

山陰何定甫司馬。寓祥符新街口一宅。移居之明日。初更許。自外歸。一僕以燈前導。行至廊下。突見一人向僕身邊一閃而過。司馬行稍速。恰與相撞。其人驚倒於地。驚而扶之。乃紙灰一堆而已。相與駭詫。以爲不祥。司馬大病。月餘始愈。新齊諧謂水死之鬼。羊臊氣。岸上之鬼。紙灰氣。此則鬼化爲灰。或芻靈所變歟。屍被剜眼。自言有難。

京師西山業煤者姚某。父子三人。父死。兄入村買棺。囑弟守屍。弟某年甫十五。獨處空山。不能無恐。夜二更餘。睡矣。忽覺耳邊有冷氣吹入。有人附耳言曰。有難有難。起守吾屍。勿貪睡也。已而又然。大驚而寤。旋聞遠處有哭聲。隱隱而來。愈聽愈近。俄見一人披麻衰經。啓帷簿而入。某大懼。不能出氣。時惟屍前一燈熒熒。不見面目。但見其向屍直立。一揖後。遽抱屍頭而哭。其聲悲慘。聞之毛髮

爲豎約一茶許。始痛哭而出。某駭欲死。又無鄰人可共語者。乃蒙被假寐。以待兄歸。天曉。兄與肆人舁棺來。舉屍入殮。始見屍兩目已失。若被剜者。弟乃緬述所見。相與駭痛。竟不知是何怪。

李孝廉兩遇鬼

上元李雨人孝廉。應試入都。寓虎坊橋逆旅。一日。於櫻桃斜街見一乞丐。橫屍於路。一瓢一杖。陳於屍側。惡之。是夜飲於近信堂。堂主人如秋。名旦也。飲至三鼓。如秋爲他客召去。李亦酩酊而歸。行至李鐵拐斜街。突見一人儼然而來。曳杖攜瓢。儼然乞丐也。甫欲避之。其人向壁一閃而入。心知遇鬼。踉蹌而歸。行十數武。見二差役咨且路旁。一役曰。姑問此公何如。一役卽含笑向李曰。請問如秋寓何處。李曰。吾適從近信堂來。朱茅胡同西第三門是也。一役出票視之。曰。是矣。致謝而去。李訝如秋有何事。致煩官役。甫擬問訊。二人亦歛然滅跡。乃大驚狂奔。將至五道廟街北口。又遇一人。衣冠華整。笑謂李曰。公已醺然。夜深獨

行。得毋少畏乎。李幸遇同行。胆爲之壯。卽告以所見。其人曰。此地素不淨。吾正無事。當送公歸。卽扶李返寓。至門而去。李甚感之。至解衣時。始知荷囊所貯銀票。已不翼而飛矣。蓋前所遇者鬼。而後遇者賊也。明日訪如秋。果以夜半暴卒。

書房鬼笑

安邑武仰齋大令爲秀才時。攜其甥興兒讀書於別墅。一夜三鼓。興兒如廁。仰齋方屬一文。構思未就。忽聞背後有步履聲。以爲興兒。未措意。不料腦後猛然大笑一聲。磔磔如老梟。大驚。回視並無一人。急趨出戶。大呼興兒。興兒自廁應之。並問適所笑者爲誰。蓋興兒亦聞之矣。仰齋候其出廁始返。甫啓門簾。又緊對其面。呵呵大笑一聲。興兒在後聞之。驚仆。乃移居別室。一月後。一友來談。至三更而去。仰齋送出大門。甫歸入室。忽聞門外笑聲大作。與前無異。仰齋謂其妻曰。吾友聞此。必復返矣。俄聞敲門聲甚急。急趨迎之。友面色倉皇而入。曰。揖別後。吾提燈行。甫舉步。聞有踵吾後者。問之不語。甫一回視。突聞面前大笑一

聲而無一人。幸吾胆尙壯。否則遭嚇死矣。仰齋乃留宿於別室。具述所聞。相與駭怪而已。

鬼作葉子戲

武進張孟則大令需次中州時。爲友人送殯於浙江鄉祠。夜間無事。偕數友爲葉子戲。三更許。偶出便旋。過其亡友姜厚庵殯宮前。姜亦其平日共戲之友也。孟則戲呼曰。厚翁獨臥寂寥。何妨到前室。與吾輩一爲葉子戲乎。室中某某。皆君熟人。無別客也。語已而歸。與同人言而笑之。戲至數周。孟則方欲手拈。忽一葉子翩翩而起。直立空中。若有人拈之者。衆大駭而散。知爲姜之靈也。

大鬼

予友李子申觀察。一夜醉行。見一肆外有物如棉。稍近視之。物有面目。如人。但肥瘡癡呆不類生物。大腹膨脹。如五石瓠。舉體皆白。李自念曰。此必肆所售物。磁耶泥耶。何夜深尙不置之室中耶。俄風過處。似覺動搖。頓悟曰。乃紙紮者耳。

且念且行。直至其前。始見其蠕蠕而動。尋蹣跚起行。李醉後胆壯。卽亦不懼。尾之入於委巷而沒。不知是何怪也。

犼

崔季芬軍門言左文襄西征時。軍隊駐伏羗縣。時方正午。忽有一物如驢而大。徧身黃毛。口吐火燄。長幾尋丈。自南門而入。所過處市肆牌匾。爲之焚燬一空。市人鳴金鼓噪逐之。乃直穿北門而出。入於河。河水爲沸。久之乃沒。識者謂是犼也。新齊諧云。是僵尸所化。倘或然歟。

外國異事三則

王菴生觀察言英國有古屋一棟。傳聞屋主客死於外。故久廢云。近有居者。每至深夜。輒聞徧室有聲如築。窸窣然徹曉乃已。居者駭爲妖鬼。移去。有哲學家某笑其迷信。以爲必有生物窟穴其中。欲察之以破其妄。乃偕其友居之。布灰於地。覘其足跡。明日視之。足如驢蹄。不四而二。怪之。其夜覆燈以俟。聞聲驟

出。正是一人。而面目模糊不可辨。見燈光。踉蹌而走。追之至樓梯下。倏不見。明日發梯視之。赫然一屍。僵而不腐。而面目及遍體皆潰爛。其二足則木裝者。使醫驗視。知其生前曾患癩瘋。其足亦爛脫者。故裝以木云。後其老僕之孫稍稍泄於人。云其人富有貲。晚年病瘋。恐爲人所厭惡。不見一人。而詭言出遊。將死。囑其老僕卽置屍梯下。而以磚砌之云。其後怪絕。

又云。法人某武斷鄉曲。爲怨家所殺。其姑以其髑髏置於篋。藏諸樓上。後有居是樓者。輒出而爲厲。有某毅然不信。獨居之。夜見一頭顱自篋突出。鬚髮蓬鬆。張口露齒。躍登於榻。某大懼。揮之以刃。杌然有聲。墜於地。猶跳躍不止。某大呼人至。始入地而滅。今百年矣。遂無敢居者。

德國一兵房。居者輒患頭痛。廕午樓侍郎爲彼國軍官時。聞之以爲妄。試往居之。果頭痛而出。某營官者老矣。斥其迷信。襆被往宿。比曉不出。視之已僵矣。

老吊爺

開封府城隍廟西廊南轉角處。有小殿一間。中塑縊鬼像十餘區。冠高冠。披白袍。肩荷雨具。手提布囊。瞪目吐舌。形容可怖。或坐或立。狀略相同。殿正晝不見日光。入者毛戴。土人呼爲老吊爺云。相傳爺黃姓。縣之鄙人。販布爲活。爲人口直迂謹。喜捨施。爲夥友。耗其資。不得歸。遂縊而死。死後頗著靈響。友人爲廟祀之。祈禱輒有驗。里婦攜小兒嬉於殿上。戲祝曰。吾輩須回家操作。爺爲我好護兒。勿令啼也。卽去。至暮來看兒。兒嬉戲如故。不出廟門一步也。以是人爭祀之。久之。遂附祀於城隍。不知所自始也。有彭敬山者。漢軍籍。與余家有世誼。年四十餘。倜儻喜爲詩。同治辛未。訪先大夫於河南撫署。館於偶園。余業師姜仲山先生詣之夜話。步至窗外。聞彭與人談論甚驩。以爲同幕友也。旣入。止彭一人。問其適與誰語。彭諱言無。其後屢聞之。但不辨爲何語耳。一夜又至其窗下。聞彭語曰。我去固好。但恐無人爲我買好木作棺材耳。師聞之。大駭。急推門入。仍彭一人。乃固詰之。仍諱言無。師正色曰。君已着魔。尙不醒悟。誰約爾去。買棺何

爲不實言。死期將至。必告中丞親訊爾。彭囁嚅言曰。適約我去者。老吊爺也。君入渠始去。與君交臂而過。君未之見耶。我自寓此。渠卽來。云有某國日勸我去。我固不願。且不知何處去。今日渠始言去卽死也。我正以無好棺謝之。而君來矣。其餘多迷離恟恍之辭。不能悉解。師大驚。乃伴之達曉。言於先大夫。遷之別館。吊爺始不復來。按吊神雖不見於祀典。却從無騷人事。且旣附祀城隍。神豈容之乎。此園自設亂以來。頗有怪異。得毋他鬼假其名以求逞歟。表兄樊少蓉嘗宿其中。夜見鬼火滿室。錯落如星云。

縊鬼

京師名伶賈鴻林。月夜隨其叔玉洲自韓家潭歸虎坊橋寓所。鴻林籠燈前行。至西口。恍惚見白物一堆。傍電綫竿而立。未措意也。其叔在後。忽大叫一聲。遽仆於地。視之。口角流血。已就斃矣。急呼人灌治。良久始甦。云見一白衣冠者。倚竿矗立。初謂喪家子。不之異也。旣近。乃見其冠高幾及二尺。喪面流血。兩眼下

挂。舌出於口者數寸。儼然戲劇中所扮之吊客也。一見其面。卽覺冷氣逼人。遂不省人事。旣醒。遂無覩矣。歸後大病數月。竟不起。玉洲爲老曲師。吳梁奎外。無與並者。弟子知名者十餘人。前數月吳死。從此京班中遂無名教師矣。鴻林日短視。嘗以爲恨。自經此事。乃自笑近視眼亦有便宜云。

疫鬼簿

順天長新店曹叟病死。殮三日矣。家人忽聞柩有捶擊聲。又隱約有呼悶煞悶煞者。疑叟復生。啟棺視之。果已活矣。急扶至榻上。神氣漸清。宛然如未病者。自云病劇時。恍惚隨一人至一衙署。堂上無人。但見案上有冊籍。高可尺餘。竊視之。皆里人姓名。戚友數人在焉。疑是糧簿。問之旁人。皆笑不答。予乃回家。不知何時置我棺中。氣悶欲死。我已三日不食。饑不可忍。速作飯飯我。家人皆喜。謂叟更生矣。俄食粥盡一器。方與問答。忽不語。視之。目已瞑矣。其復生止一小時。未幾疫作。死者數萬人。所云戚友冊中有名者。果俱死。此光緒十八年秋間事。

倉神

固始祝大令華。所居湫隘。夏日苦熱。家有廢倉。乃移榻其中。時甫二鼓。方坐而吸煙。忽見兩人自暗陬出。步於庭院。高約丈餘。頭紅色。尖而小。如胡蘿蔔。一袒胸。兩乳下垂。幾及臍下。似是婦人。其一頭亦如之。但無乳耳。似是男子。以手攙大乳者蹣跚而行。祝坐視既久。毛髮爲豎。行院數周始滅。一夜聞其妻女號救聲。趨視之。俱仆於地。問之所見亦此怪也。祝氏呼爲倉神。不爲害云。

鷹嘴村土妖

吾鄉廣寧山。卽古之醫巫閭也。山麓一村名鷹嘴。以大石矗立如鷹吻。故名。村民張叟所居。適在其下。叟以負販爲業。僅敷饘粥。一日有遠方道士踵門求宿。叟素好客。掃榻留賓。款待優渥。道士曰。過蒙款接。無以爲酬。某略風鑑。藉以報德。隨指鷹吻曰。此石與君家大有關係。如以短垣護之。勿令汗穢。可以致富。倘不知而誤損其吻。必有不利。切須慎之。張疑未決。道士曰。請加防護。十日內。禁

兒童不得嬉戲其下。當令君利市三倍。倘不見信。某卽留此待驗而後行。何如。叟果使其三子輪守。不令人到。時方與人倒把。未幾果贏百千。倒把者。譬如豆斗值百錢。隱度時價。下月可值百五。卽署空券與人爲博。曰。買豆若干。不必有銀與豆也。屆時豆價果至百五。卽贏。否則負。湖廣所謂買空賣空是也。以此信之。疊石爲垣。并插棘護之。厚酬道士而去。叟自是日富。家累千金矣。年餘有術士游於近村。爲人言休咎。輒有驗。一日。至叟門外。暗曰。此誰氏宅。正值凶煞。居者將爲餓殍矣。叟適在門外。具聞之。卽邀至家。以酒食款之。請畢其說。術士指鷹吻曰。君家旺氣。爲此所制。去之則吉。存之則凶。今不去而反護之。蔑有濟矣。張以道士之言告之。術士斥之曰。此邪說也。若不吾信。試以片席遮鷹吻。十日內必獲萬金。某亦當留此待驗而行。叟惑之。便如所教。未幾果贏萬金。叟大喜。過望。恨得術士之晚也。厚酬之。立呼匠氏鑿去其吻。此後三月。凡贏萬金者三焉。叟有三子二孫。家又日富。人皆羨之。居年餘。道士復來。遠望鷹吻已失。倉皇

來曰。聽誰邪說。教君去此者。禍不遠矣。叟笑曰。幸去之。吾得小康。若聽君言。仍故吾耳。先生休矣。道士退。謂人曰。教伊爲此者。其人略解刑尅。而不知此下有土妖。必賴此吻以制之。若如吾言。可以久富。今失所制。妖孽將興。其驟富者。譬諸植物。菁華將竭。花反盛開。盛極而衰。固其理也。一月後。叟必暴死。叟死。方有奇禍。殃及鄰里。驗後。試掘庭心三尺。當有物。急毀之。否則跋扈難制。而一方被難矣。言畢。嗟嘆而去。里人羣笑其妄。俄而叟卒。家人以叟已篤老。未之異也。其子爲盛治喪。發引之夕。鄉鄰來會葬者百餘人。吾鄉家有土匠。可容數十人臥。是夕近三更。客皆上匠臥矣。惟西隣一禿兒。展轉不寐。忽聞院有步履聲。俄見一巨人啓扉鞠躬而入。黃冠黃袍。以至面目鬚眉。無不黃者。左持一斗。右手一刷。俛視衆人。目光睽睽。兒大懼。蟄伏他客胯下。屏息窺之。但見斗中滿貯黃泥。其人以刷蘸泥。徧刷各客耳目口鼻。積可寸許。刷畢。屈指數曰。記是三十九人。何不足一耶。已而曰。姑饒他。且去且去。俄至庭中而沒。兒推衆客。皆若僵。乃踰

垣而歸。其家怪之。乃具述所見。家人並嗤其妄。不之信。比曉。聞東鄰譁噪聲。探之。始知客居凡三室。死者五十七人。叟之二子一孫與焉。合村驚痛。訟於官。官以爲中毒。鄰以兒言白之。及檢驗。並無黃泥。不如兒言。惟屍面目皆作黃色耳。雖據禿兒所供。懸爲疑獄。而叟之家傾矣。事已。好事者於庭心拍地驗之。得一伏兔。如以土搏成者。色黃而質堅。眼微開。前足欲起。後足猶縮。敲之作金聲。急毀之。乃知道士所謂土妖。卽此。而鷹所以制兔也。此雍正十年事。案牘猶存。

鬼赴磔口現形

揚州某封翁。與天寧寺主僧了禪交好。布施無算。其子太史某。心弗善也。封翁死後。某謂了禪曰。師道行清高。吾父素所頂禮。某聞瑜珈磔口。能召亡魂。後日一七。請師主壇。倘能令某一見父面。當重脩長住。以報佛恩。否則吾父生平施捨。俱屬唐捐。吾亦不復信佛矣。了禪唯唯而退。心竊憂之。陰念賣菜傭劉叟。貌與封翁相似。乃召劉來。使屆期先伏案下。至誦至召亡時。乃牽帷一露其面。卽

刻退出。倘不敗露。以十千爲酬。劉諾而去。至一七日。了禪率衆僧登壇。誦經時。屆三鼓。恰當召請亡魂時。忽就壇前。陰風颯起。燈火盡昏。歛見一人自案下探半身而出。白面長鬚。太史視之。果其父也。大哭趨抱。燈火驟明。全無所覩。自是太史傾信了禪。較父尤甚。乃重脩禪宇。煥然一新。了禪私幸得計。而飄風忽起。若助己之成功者。逾數日。攜錢謝叟。至則其家白旛高颺。正延僧誦經未已。問之。則叟恰於自寺歸家後暴疾死。封翁首七。卽叟死之第三日也。了禪大驚而返。竟不知是夜所見者。是封翁之鬼。抑劉叟之魂也。鄧孝先說。

神救人不必貴人

祥符薛君雨秀才。授讀於朱仙鎮。去其家五里餘。一夜微醉還家。適微雨。支傘跋屐而行。行將及半。雨甚。忽見道旁有一人家。雙扉扃焉。自念平日過此。殊不記有此家。方僂叩門避雨。不意着手門開。斗然跌陷。驚視門戶無存。身落道旁。冀窖中矣。幸兩臂架閣。懸空未墜。憶及窖深數丈。倘陷其中。決無生理。而兩臂

已酸。勢難久閣。又去村已遠。雨夜必無行人。自分死矣。忽聞有大呼薛秀才者。薛卽高聲呼救。俄見一人冒雨而來。蓋西村之賣菜傭張乙也。問其何緣知某落窖而救之。乙曰。我方睡着。覺有人呼曰。起起。速到糞窖邊救薛秀才去。我俄延未起。又擊我臀。促我速去。我卽前來。不意果遇先生。先生果是秀才姓薛者乎。薛具告之。叩其里居。乃去此三里許。計其時。薛甫出門耳。蓋土神知有鬼將。黻薛而先使乙來拯之也。特旣爲土神。豈不能阻鬼使勿爲。而必假手於乙何也。或曰。神欲顯其靈異故。或曰。非神。薛氏祖宗之靈也。自是合村敬薛。以爲必貴。後竟以青衿終其身。

土神畏通判

江右蕭香泉方伯族弟某。性頑劣。幼讀書於土地祠。屢以荒嬉廢業。師怒責之。使跪於神前。是夕。里老夢一隻一婆。謂曰。吾輩在此受些香火。甚覺冷淡。近有貴人蕭公。在祠讀書。出入更覺局促。不意其師。竟令我回避牆角。

終日不安。便煩轉語塾師。幸勿再惡作劇。吾輩弗能堪也。言畢而去。同夕夢者七人。乃共向塾師言之。師性倔強。謂里老受蕭囑。詐言之也。故使蕭跪神前。終日夜夢土神拄杖來曰。爾不過一老廩生。竟敢責罰貴人。折盡福祿。今復嫁禍於人。令向我跪。倘被遷怒。豈不被爾連累了麼。前託人傳語。爾猶不悛。何倔強乃爾耶。隨以杖叩其脛。一痛而醒。自此不敢令蕭罰跪矣。衆謂蕭必大貴。蕭亦竊喜自負。後四十猶潦倒。方伯爲納粟。得通判。需次山東。竟偃蹇以終。或曰。蕭必有隱慝。致損祿籍。余謂土神職卑。直一通判向之長跪。已消受不起耳。

王建侯妾

余姑之夫之姪王建侯司馬。前所記見夜明珠鬼燈者也。光緒庚寅夏六月。其愛妾寶寶。在其叔臨穎署中。將產而病。建侯自汴往視。夜宿許州。心悸弗寧。初覺牀下有物踏碎磁器聲。視之無有。隨和衣仰臥。忽覺有人昇牀而起。愈上愈高。直將其鼻擦於頂。榻猶上騰不已。口鼻爲塞。氣悶欲死。乃大呼一聲。斗落於

地。一跌而寤。似是夢境。而鼻尙痛不止。乃呼僕伴於別榻。甫交睫。忽見寶寶姍姍而來。鬢髻宮妝。面容愁慘。向之俠拜曰。儂歸去矣。王惘惘送之出門。登輿而去。寤而大痛。意其死矣。急馳至署。寶寶故在。但產難不下。神癡已三日。見王不作一語。又二日卒。知其生魂早去矣。其後予姑早飯後。倦而假寐。見寶寶來曰。我去已久。二太太猶談我舊事何耶。姑驚寤。側耳聽之。二太太果正與婢媼輩話其往事。二太太者。余姑氏之先後宛若也。寶寶亦靈矣哉。

侍者鄭英歿後。亦見夢於余。曾爲志墓之文。附識於後。俾有傳焉。

姬名英。姓鄭氏。浙之山陰人。年十一。隨父賈於閩。十八父死。乃歸余。事余凡八月。卒。葬於閩縣城南道山亭下。姬初至。高髻鬟。曳黃絹裳。面窗東向坐。余入與語。輒起應。而閩音函胡不可辨。余笑之。後亦稍稍通北語。一日。假山小桃作花。姬艷妝履石磴間。矚視自語良久。余從牖間望見之。戲曰。綿蠻黃鳥。止於邱隅。姬面微頰。詰之曰。身不知書。然語意似相諠也。然姬故識字。諷誦

唐人小詩。能上口者百餘篇。尤善釀酒。方春酒熟。輒杯泥。余飲。余小戶。稍飲。輒面赤。語不達於舌。姬匿笑謂余曰。君當復笑人耶。余爲大笑。性明慧。婉嫵。家人皆愛憐之。而眉黛間常有恨色。乙亥六月。余將北行。赴京兆試。姬請從。不得。尤悒悒。中秋闈中。夢姬華妝來別。顏色慘阻。寤而訝其不祥。後聞姬死之日。卽入夢之夕也。傷哉。姬且死。無別語。惟曰。甚思一見公子也。銘曰。虛如夢幻。溘如露滋。吁嗟體魄。止於斯。魂氣無不之。尙其余隨。

濟南學署狐

濟南學署。北去明湖不數武。二堂後有池如帶。曰海棠汎汎。後有樓五楹。施尙白先生顏之曰四照。近納湖光。遠含山淥。最勝處也。不知何時。奉爲仙居。常加扁閉。拈香始一啟焉。樓下東室爲積古齋。阮文達脩彙器款識處也。西室樓梯所在。不以寓人。鈕潤生姊婿視學時。幕客鄒仲眉上舍毅然居之。時值隆冬。甫解衣就枕。卽覺腹漲內逼。急起如廁。溲便俱無。如是者夜十數起。乃懼而移居。

余自汴來省姊。宿此數夜。幸無所覺。後聞鄒有此事。亦移居去。族兄元圖以公事自汴來時。署中賓客甚盛。無下榻處。乃寓此室中。半夜睡覺。聞梯級足音。蹴然。俄見一白鬚叟立於榻前。拱手爲禮。兄急欲起。叟止之曰。僕甯氏。兄疑之。叟笑曰。卽甯武子之甯也。幸遇君子。竊有所託。僕全家皆住樓上。此屋寓人。頗妨出入。請語學使。勿再寓人。感且不朽。兄知是狐。頗覺蹶踏。卽曰。僕明日卽行。能容一夕否。叟又笑曰。君明日豈能行。暫住四日無礙也。言畢。鄭重而去。明日欲行。而役夫來告云。汝河驟漲。橋梁已壞。渡口小舟不敢輕涉。非候水落。不能行也。果又候四日而行。狐能前知。信矣。

朱昇遇鬼

小僕朱昇。汴人。文秀嗜書。尤工作蠅頭楷。同治壬申。隨余赴閩。舟次蘇州。入城購琴絃紙筆等物。以舟子導之而行。至暮。舟子獨歸。云其家去肆不遠。欲往省視。囑朱坐肆候之。及反而朱已去。徧覓不得。遂先歸云。旣而候至二鼓不來。余

命羣僕持火於城外覓之。得於閭門外。身伏叢塚上。神已癡矣。急以薑湯灌之。始漸清醒。自云。方坐肆中。候舟子不來。偶出眺。不覺竟至是間。盤旋久之。無路可出。遂倦而臥。自是精神疲繭。夢中恆聞其與人昵語。臥具遺精殆遍。疑其有所遇也。問之。迄不肯言。至杭病愈甚。稍閒。游吳山。至城隍廟。歸而不能言。是夕。余夢其叩首牀下。晨起問之。果於夜間死矣。年甫二十四。余痛惜之。爲備棺衾甚具。後三日。先太夫人夢其衣帽來謝曰。蒙恩賞甚厚。今將回汴。特來叩謝。太夫人問曰。汝歸有伴乎。對曰。將與方慶之奴同去。領之而寤。蓋老僕方慶有重臺某。亦汴人之歿於是者。太夫人初無所聞。至是問之始悉。蓋死於昇前五日云。信昇之有靈也。其來也。余以其年幼路遙。初不許。昇曰。奴聞是行路出於杭。苟能一攬西湖之勝。卽不至閩。亦無恨矣。不料竟成讖語。乃葬之於西湖之茆家埠。以遂其志。並爲文以志。今附銘詞於後。讀之可以略見其爲人矣。

汝名士風。居於奴。奴則其身。行則儒。瘞汝於斯。汝願如我銘。其幽永無除。

冬張店鬼

陝客甲乙二人。販布河南。路過冬張。一店新開。賀客未散。卽往投宿。主人便拉入席。款接殷勤。約至二更。座客盡去。主人導至一院。滿地槐花。境甚幽寂。室中几榻陳設。洒掃清潔。似新葺者。惟壁上篝燈一盞。冷燄無光。主人曰。歲歉油薄。無如何也。隨出巨燭二挺。曰。如嫌黑暗。可爇此繼之。旋請客安置。匆匆復喚店夥耳語。久之而去。二客展襪對臥吸煙。燈亦不明。旋挑旋縮。乙偶回首。見桌下露一人首。急起視之。絕無所覩。語甲而怪之。甲曰。君眼花矣。此等潔淨。尙有他耶。言已各睡。甲就枕已鼾。乙猶未寐。忽覺冷氣吹面。臭不可聞。有人言曰。醒醒。看看。我視之。乃一女鬼。對己吹氣。間不盈尺。蓬首喪面。袒胸赤足。遍體鱗傷。浴血而立。旋自壁傷處肉。片片墜地。拍拍有聲。乙爲陰氣所逼。不能出聲。適甲睡醒。睜目見鬼。失聲大叫。鬼卽轉身向之吹氣。甲覺涼氣入骨。亦不能言。正危急間。忽有爆竹一串。自門外擲入。正墜鬼所立處。劈拍之聲。震動四壁。鬼滾倒於

地。聲啾啾然而滅。視之乃店夥也。俄主人亦來。甲乙責其明知有鬼。而留客宿。怒欲訟之。主人曰。此室舊有鬼爲厲。無敢居者。空廢廿餘年矣。某近以賤值購之。拆而重新。以爲可無事矣。明見貴客年富氣盛。故敢留宿。恐有疏虞。特命夥伺門外。倘有所見。卽燃爆竹爲號。某便自來。所以不先言者。恐客駭懼故也。不意鬼果出現。某之罪大矣。急爲客掃榻別室。更取酒款之。迨曉而去。及歸路復出此。試往探之。則自客去後。鬼竟滅跡。蓋硝磺之烈。無異雷霆。鬼不過陰霾慘厲之氣。凝聚所成。一經震爍。卽消散無餘矣。乃仍宿此室。安睡達旦而去。

鬼索茶

汴省城隍廟西穆藹堂。厝棺之所也。光緒癸未。許僊屏河帥如夫人殯於此。守卒四人。方夜話未寐。忽見一婦人出自西室。年四十餘。冠帔儼然。逕過其前。入東室去。旋聞室內有兩婦寒暄聲。一婦曰。我子婦大不孝。置我於此。便無事矣。我口渴甚。並茶亦不與我喫。殊可恨。我回家索之。一婦似相勸慰。而語低不可

悉聞。俄見婦復入西室去。遂寂。卒大駭。問之守者。厝於西室者。乃浙人薛觀察之妻也。東室則其戚陶氏婦云。天曉。薛氏果來奠茶。其從人云。其子婦夜夢其來索茶喫。聲色甚厲云。

鬼看新婦

任城潘生娶妻甚美。合卺之夕。時已三更。賀客盡去。生闔戶已。謂妻曰。可睡矣。妻方坐窗下。以手外指示意。使勿語。濟寧故有聽房之俗。而生家固無人者。生笑謂無人。妻仍指窗外不已。生卽啟窗簾視之。果見院中頭顱攢動。約數十人。怪而叱之。不動。隨啓戶出。乃不見一人。駭而入視其妻。已倒於地。口吐白沫。扶之上牀。寒熱交作。瞪目大言曰。我等來賀喜。看新人。有何罪過。叱者何也。生知妻爲鬼附。問爾何等鬼。安所從來。鬼曰。我等俱從對門于家來。問在于家何處。曰。在其門外吹鼓樓中住。請主人從豐賞喜錢。我等卽去。蓋對門爲于次荷別駕所居。司馬爲其太夫人聞弔。門外恰以蒲搭二吹鼓樓。不料鬼卽居其中也。

乃爲焚楮幣送之。鬼雖去。而新婦竟以疹疾卒。蓋鬼乘其衰氣而弄之也。

棺中人語

開封省城西北隅有孝嚴寺者。傳是宋將楊六郎爲其父業資冥福處也。寺西別一院落。列室數十椽。爲厝棺之所。白晝陰森。入者毛戴。先母樊太夫人殯於寺之後堂。予兄弟居此寺者三月餘。幸無所覩。惟梟鳥甚多。夜輒聞其鳴嘯聲。致可怖。小僕長慶性頑劣。一夜偕其侶尋聲往捕梟。入於厝棺之室。伏於椽。必登樞上。始能攫之。其侶懾而止。長慶毅然登之。足方及樞。突聞棺中大聲呼曰。長慶踏壞我室。我行告汝主人。痛挾汝。長慶驚踣。其侶挾之逸歸。病數日始已。

走屍爲電氣所成

祥符候補通判某。病死未殮。值大雷雨。每電光一閃。屍爲一動。守屍者大駭。以爲走屍也。急以棍扼之。屍猶躍動不止。至雨霽乃已。光緒癸未七月。暴風怒雷。天津城東有華翁者。陳屍待殯。霹靂一聲。屍忽挺立。家人急掩其門。門未及掩。

而屍已追及。幸爲屏隔。未遽出。抱屏而僵。至曉天晴。衆視屍。尙倚門立。右手四指。插入木中。深沒其甲。衆人力挽始出。津人李慶辰紀其事。謂雷能辟邪。此反因雷致變。爲不可解。竊謂屍變非由雷震。乃因感電故也。西人因見死蛙顫動。而悟電理。謂凡生物。皆有電。而貓之電爲尤多。試於暗處拂拭其毛。則有火星爆出。且電有陰陽兩種。互相翕合。如磁引針。電線因之而作。余因悟人新死者。陽電已去。陰電尙存。苟觸陽電。卽能躍動。甚者起立逐人而行。實則非逐人也。爲人陽電所吸。故逐耳。或爲帚所掃而倒。亦非畏帚也。兩電爲帚所隔。故倒耳。故俗傳屍身最忌貓犬跳躍其上。守屍者亦忌以足向屍而臥。謂能致屍變。不知皆是故也。西人防電之法甚密。從無走屍之事。遂闕而不論。我國雖屢見其事。迄無能言其理者。袁氏新齊諧記南昌士人屍變一則。論曰。人之魂善而魄惡。人之魂靈而魄愚。其始來也。一靈不泯。魄附魂以行。其旣去也。心事已畢。魂一散而魄滯。魂在則其人也。魂去則非其人也。世之移屍走影。皆魄爲之。惟有

道之人。爲能制魄。紀文達筆記。記屍變事。引其說。以爲鑿鑿有精理。而又疑其有他故。時電學猶未發明。故云爾。使聞吾說。必釋然矣。

近見時事報記某家雨夜走屍事。云不解其理。亦感濕電故耳。

生人受祭

洪惺蘧大令。幼時夢至一寺。浮圖高矗。殿閣莊嚴。寺後土山迤邐。竹樹翳然。登眺久之。西達一院落。正室三楹。檐前懸紗燈四盞。已黯敝。中堂几筵。肆設肴饌。甚豐。洪正覺腹饑。卽據上坐。恣意大嚼。恍惚似抱一嬰兒者。啖畢而寤。腹爲之果。自五六歲至二十餘。每屆令節。及清明中元。必一夢焉。歷歷不爽。同治癸酉。應京兆試。同人邀飲於西山某寺。經過塔院。恍如舊遊。俄憶夢中所至。卽此寺也。乃問寺僧曰。後有土山。山之西有一院落否。僧曰。有之。洪曰。檐前紗燈尙存乎。僧以爲洪曾來也。同人知其初次入都。異而詰之。洪乃具言所夢。尋至其處。果如所言。几筵尙設。後停一棺。視其前和。題曰陶安人之柩。僧云。是城內陶姓。

之婦。年二十四。以產難卒。停此三十餘年矣。衆譁謂洪乃陶之後身。洪亦愴然。自謂事機已泄。當不復夢。既歸。夢復如前。又五年。至光緒戊寅八月二十日。又夢至其處。飲啖甫畢。忽烈火燒身。撲之不滅。雖不覺痛苦。而熱不可耐。大呼而醒。異之。遂從此不復夢。又二年。引見入都。特如寺訪之。寺僧云。陶氏漸貧。無力還柩。乃火之。而攜其骨歸。叩其年月。卽洪夢火焚之日也。

芻靈夜語

余友查蔭堦太守。其母夫人病劇時。紙紮輿馬人役十餘事。置之空屋。更夫劉四夜行至此。忽聞屋中人語甚驩。有云已傳伺候。而我帽不見。誰藏去。速畀我。勿作劇也。劉四知是芻靈共語。叱之寂然。俄聞上房哭聲大作。知太夫人卒矣。及取芻靈焚之。果有一役。帽墜於地。

銀化小兒重六百七十二兩

濟寧孫文恪家佃人李七。偕其妻夏夜守瓜圃。夜深人靜。忽見月下有二小兒

相撲爲戲。一衣黃。一衣白。村中固無是兒。其妻謂之曰。二兒大可異。得非金銀所化者乎。捉而驗之。試看何如。明夜李伏暗陬伺之。二兒果來嬉戲如前。俄而兩相糾結。李大呼躍出並擒之。而黃衣兒猛甚。力掙脫去。李抱白衣兒。與其妻急追之。不復見矣。白衣兒在其妻懷。踴躍大啼。較常兒重甚。急抱歸。至燈下觀之。兒驟縮。纔一尺餘。合目而僵。果銀人也。投之於沸湯。猶聞啾啾作聲云。明日權之。重六百七十二兩。文恪聞之。以銀易歸。余客任城時。曾親見之。眉目秀媚。似刻畫。衣關領有緣。襖襠露陰。如僵蠶。精緻細膩。非塑工銀匠所能到也。惜當時已斷其一足。蓋恐其再化去也。後七屢伺黃衣兒。終無所覩。自謂黃衣者必金人。到手復失。終身以爲恨云。

尙方伯目能視鬼

余友尙惠臣方伯。目能視鬼。習見亦不爲異。在河工時。余偕之至水繪軒司馬家。司馬引至一小室。戲問尙曰。試看此室有鬼否。尙曰。有。已見之矣。其人坐於

東隅年六十餘。着青布馬褂。灰布袍。面容愁慘。見君若素識者。水曰。噫。余之友白文川也。上月自通州來訪余。歿於是室。其病時所着正如是云。方伯云。生平所見鬼。略如人。無甚殊特者。凡鬼多從壁間出入。略無阻隔。若正晝由大門入人家。其家必不祥。曾見一鬼入謝師曾家。以語余。未幾。謝果死。又云。鬼多上身清晰。下半模糊。不見其足。惟一次最慘。一最可怖云。其妹死。殯於西室。夜隨其母夫人往哭。正見其妹立於棺側。聞其母哭。拊心疾首。悽慘殆不可狀。尙不忍觀。乃勸其母歸。其妹自後牽母衣。似戀戀不忍舍云。又與邵姓宿河間。一逆旅。邵已睡熟。已猶未寐。忽見一丈夫逡巡自暗陬出。肥而短髭。髮辮盤於額上。袒胸赤足。面插一刀。血跡模糊。狀甚愁慘。聞方伯微嗽。卽遁去。俄復出。至邵臥側。邵卽夢覺。方伯故嗽。卽又遁去。一夜數出。迨曉始不見。問之。邵但覺睡後陰冷。不可耐。蓋是冤魂幽鬱此室。爲生人陽氣所灼。不能安其居也。方伯以行期促迫。不能一訪其人。爲雪其冤。恆以爲恨云。

陰間當差亦須奏調

宛平查撫庭、湖州陳笠亭、漢軍蔣閏生。皆先公舊屬也。公捐館後三年。查罷官。後客居任城。陳守澤州。光緒壬辰十月某日。查夢陳來謁。朝衣朝冠。而不戴花翎。異而問之。曰。花翎戴之不便。已置身旁矣。吾此來因李老帥奏調差遣。與君同差。故相約謝委耳。查曰。吾久居鬱鬱。亦欲出山。且在河帥處當差。尤所心願。但家事紛繁。都未料理。須俟吾弟明正自汴來。始能去耳。陳似不可。已而曰。老帥處需材甚急。君去不容太緩。現在我後任蔣閏生。亦老帥舊人。且約伊去代君數月亦可。君須作速料理。勿久延也。言畢而去。醒而異之。方欲作書致陳。而陳之訃至。署其任者果蔣君。知非佳讖。俄聞蔣甫視事亦死。查大駭。以書抵余。述其事而憂之。時已嘉平。固無病也。至癸巳元旦。其弟自汴往視。見面數語後。忽云頭眩。遽卒。始悟陳言花翎戴之不便。已置身旁者。謂大殮也。惜未言何以奏調。並辦何事耳。

湯文端公丙舍鬼

蕭山湯伯述觀察。十一而孤。葬父時。隨其母宿於乃祖文端公丙舍。夜半睡醒。見一婦人。年約三十許。髻髮如蓬。面黃瘦。以手牽帳。探半身。向其面審視不已。湯初不以爲鬼。以其狀可怖。伏母懷不敢動。亦不敢聲。良久始出戶去。時殘燈猶燦。所著灰布衣。青布裙。歷歷可見。乃呼其母告之。既見外戶未啓。始知其非人也。

姚家花園怪

武昌姚氏園。有亭臺花石之勝。以事沒於官。黃鮮庵學士爲兩湖書院山長時。借居於此。正室三楹。與其子兩頭居。一夜。學士夫婦方坐語。聞子室內若有玻璃數十塊碎於地者。琮琤可聽。良久乃已。俄其子自內出。問之。殊無所聞。又其女。月夜見一人。舉體如炭。惟兩眼粉白。睛突出如嵌雞卵。向之扶服而來。女大呼。人至始渺。今以爲學務處云。

靈公神異

長白靈中堂漉薨後。方首七誦經。公子忽仆於地。扶起。正坐大言曰。我回來了。速請趙老爺來。趙老爺者。工部主事趙亮熙。公得意門生。其家託辦喪事者也。適陪客坐。急趨而入。公子舉手爲禮。旋呼茶讓坐。瞪目言曰。我去甫七日。家中已鬧得不成事了。卽如喪事。奴輩某於某事賺錢若干。某某合分錢若干。我俱知之。若非老弟諸事費心。不避嫌怨。更不知鬧到何等光景。我感激無地。故來道謝。以後更求遇事招呼。古人云。一死一生。乃見交情。老弟古道照人。必不虛我所囑也。趙唯唯。但請放心。又連說拜託拜託而去。公子遂閉目酣眠。問其所言。恰不記憶。但覺涼氣襲人。便不省人事云。當時觀者如堵。凡識中堂者。皆云其聲音動作。無不宛肖生前。亦可異也。記新五代史記李某死後作語。與此相類。時人嘲之。謂生不能言。死後作語。乃知奇事亦無獨有偶如此。

唐令顯魂

河南偃師令唐子培病劇時。家人環伺。氣甫絕。忽見牀後立一矮人。約二尺許。面目與唐無毫髮異。但兩目赤如丹砂。向人灼灼瞪視不已。良久始滅。蓋唐之魂也。惟目赤可異耳。

黑眚

錦州南小街於同治壬申七月夜間。忽見黑氣一條。橫亘東西。其氣腥臭。聞者輒病。一夜有木工六人。醉後至此。各持斧鑿。高聲大呼。衝之而過。黑氣陡落。化為污泥。六人俱陷泥中。力拔始出。歸家細視。凡泥汗處。黑入肌膚。洗濯不去。明日臭滿一城。瘟疫大作。其泥厚二尺餘。廣幾尋丈。有司命以糞車棄之郊外。數日始盡。此亦黑眚之類也。

虎倂

山居夜半聞人呼名。勿敢磨。勿敢起。此虎倂也。人爲虎食。魂爲服役。困人以餒虎。謂之倂。隨園記新安程氏童事。奇已。吾所聞者。尤莫奇於吳髯之事。吳髯者。

河北濟源縣人。少有神勇。嘗竊某家鐵三百斤負之。一夜行二百里。質明逾河。售於某肆。某訟之。髻自投縣曰。有能負重夜行二百里者乎。吾自有鐵。售於祥符某肆。其時日可覆按也。官牒祥符詢某肆。果如所言。乃責某誣控而釋髻。一日入嵩山。薄暮迷塗。入一古寺。四無居鄰。久罕人跡。殿上厝棺五。有兩棺相並列者。髻卽展襪於上而臥。三更睡醒。聞殿外有兩人共語。一人曰。昏時有一人入此。曾見之乎。一人曰。此人方睡我屋上。爲所熏灼不可耐。故避於此耳。一人曰。勿高聲爲所聞。君善守之。我導山君來。髻知與棺中人語者僂。所謂山君者。虎也。顧無所逃免。卽移臥於地。袖七首假寐以待。俄聞寺外大風獵獵。草木有聲。時殿桷傾頽。月光穿漏。見一黑矮人導虎而入。初視棺上無人。意似惶急。繼見髻臥於地。喜而踴躍。虎俯而嗅其足。髻不爲動。漸至胸。猶堅忍不動。俄至其鼻。髻大呼。以七首力搯虎喉。虎負痛狂吼躍去。矮人驚仆。髻躍起捉之。止亂髮一團耳。黏濕而腥。乃敲火燒於所臥棺側。曰。敢有助虎爲虐者。視此。仍臥其上。

至達旦始行。覓村人語昨事。共循寺外血跡。覓之得死虎於五里外太室闕下。大如牛。四圍草樹盡拔。所臥處。抓地成坎。深三尺餘。自擘傷頸。裂見骨。七首。陷入。柄堅不可拔。云。吾友黃坦園親見。吳髯言之如此。髯云。虎食生。不食死。初見髯臥。以爲死者。故嗅之也。

蝦蟆含冰

李提督永芳隨張勤果公西征時。大風迷路。誤入關展。彌望沙磧。七日無水。時方盛暑。人馬將渴死。初飲馬溺。繼榨馬糞汁飲之。死者日百餘人。久之至一山。石谷間伏蝦蟆。數以千萬。大如覆盆。色如鋪翠。遍身礫砢。口各含一冰塊。大如拳。見人不驚。軍士取其冰嚼之。賴以存濟。尋至大營。勤果命畫圖祀之。

鬼饅頭

河南捻匪亂時。歸德馬牧集之役。勤果戰敗。失其大軍。惟姚春濂太守隨之。夜走失道。至一破屋。火燒其半。乃解馬韉。憩息其中。勤果甫臥。卽斫。太守展轉不

能成寐。忽見敗几上列一人頭。鬚髮蓬鬆。面容愁慘。方愕眙問。屢出不止。俄頃千百累堆成塔。直接屋梁。老少男女。各種皆具。目光閃閃。作怒容。瞪視不已。太守大懼而呼。勤果驚寤。始徐徐以漸而滅。勤果曰。此名鬼饅頭。凡兵燹所過。恆有之。不足異也。

蜈蚣

李愍子者。以勇不畏死得名。隸嵩武軍。駐於野寺。夏夜步月殿庭。忽見殿額大雄寶殿大字上多一橫畫。李粗知字義。笑曰。向只有大雄寶殿。此獨書天雄寶殿何耶。方注目視之。其橫畫乃蠕蠕而動。迫視之。乃一蜈蚣橫亘其上。急彎弧射之。中其頭。火光四射如星。物爲箭釘於扁上。不能去。但羣脚颯颯。拏攫而已。明日視之。長約尺餘。脚猶顫動。數日始僵。

魍魎

光緒丁酉。予承乏天津籌振局。一日薄暮。乘輿歸寓。行至東門馬道下。見一大

鬼。高與城齊。着繡花袍。烏靴科頭。面若方。相向予鞠躬而沒。輿夫見者二人。此魍魎類也。或曰。守城之神也。今城已拆去。不知神歸何處。奇矣。

王坦

鈕麗生兄弟。自河南送其封翁之柩。歸葬濟南。泛舟於河。舟中無事。共爲扶乩之戲。沙盤甫設。卽大書曰。我來矣。問爲誰。曰。我名王坦。字堦平。濟南人。向在歸德教書。七月病死。我家猶未知也。二公皆貴人。故附舟以來。奉託爲我家送一信。令接我柩。誓當結草以報。問在舟居何處。曾見我父否。又書曰。尊公已先赴濟南。我在柩前雞籠中住。稍停又書曰。我家在城南剪子巷。西向第三門是也。千萬勿忘。千萬拜託。又將勿忘兩字。加圈而去。麗生兄弟到濟南剪子巷第三門訪之。果王姓所居。不便斥言。乃託言其主人在歸德病重。令往省視。後聞其家以其柩歸。果死於七月云。

肉芝

光緒壬午。祥符令徐君桐村。督工修明遠樓。得一物如小兒手。僵而不腐。或曰肉芝也。服之成仙。按肉芝見神仙感遇傳。誠如兒手。但傳云其色紅潤。此則黑色而枯。似非其類。然亦奇矣。

爲鬼批頰

舊僕許元寓居南陽。一夜偕友人作狎邪游。元在後行。覺更有一人踵其後。行速亦速。遲亦遲。叱問誰何。不答。甫一回首。突見一巨掌力批其頰。其聲魄然。友亦聞之。乃挾之急趨。至一娼家。敲門而入。視其頰。赤色墳起。夜半叫號而死。

開封府城隍報事靈童爲鄒四爺

老僕劉喜。祥符人。病癡症年餘矣。神識固未昏也。一夜戒其妻臥於別榻。曰。夜間倘聞我與人談笑。但寐勿叱。慎勿驚詫。誤乃公大事也。其妻頷之。睡至四更。被其夫大笑驚醒。朦朧間忘其所戒。遽起問之。甫至榻前。覺有一人推之仆地。其兒婦宿於西室。聞其姑驚詫聲。疑翁有變。急趨而來。行至堂前。亦覺與一人

相撞而倒。喜在牀上歎曰。不聽我言。果爲推仆。幸我事已說妥。否則不誤事乎。適來者非他。城隍之管家鄒四爺。俗呼爲報事靈童者也。蒙他好意。引進我。爲神司雜務。約今晚議定。不久卽往當差矣。隨呼其子曰。明日晨起。可到廟爲我拜同事。凡立像若鬼判等。俱燒香一炷。不可遺漏一處一人。坐像却萬不可燒香。要緊要緊。子如所命。燒香未歸。喜椎牀罵曰。我再三囑咐。不令遺一處。漏一人。可恨逆子不聽吾言。仍將管馬號的遺漏了。俄其子歸復命。喜怒曰。香俱燒到了麼。子曰。然。喜曰。既然燒到。何以馬夫仍來作鬧。說我瞧不起他。廟門外二馬童香曾燒乎。子默然。蓋其子燒香。從廟門內起。馬童在門外。果遺漏未燒也。急往補香。始已。喜又曰。爾等侍我多日。太辛苦了。可速繫童男女來。令其伺候我可也。其家見其靈異。卽爲繫轎馬及芻靈數事。置空室中。喜已知之。怒曰。我如何敢坐四轎。你們豈非居心看我笑話乎。速換騾車來。視所繫者。果是四轎。卽爲易之。喜旋向空自語曰。你們都來了麼。好好伺候我。都有賞的。蓋所見者。

卽芻靈也。隨命名男名某。女名某。命其子以片紙粘之於背。自是不飲不食。亦不呼家人。果若有人爲之服役者。如此者又十日始死。

黃鶴樓爲歸德火神所燒

二把手小車。卽古之鹿車也。一日歸德府某小車行。有一叟來。雇車赴武昌。說定價銀八兩。酒貲一千。車夫劉三御之而行。至武昌寓小店中。叟謂劉曰。黃鶴樓爲天下勝境。盍往觀乎。劉欣然隨往。偕叟登樓眺望。久之。旣下。叟袖中出一尺。量其基址圍徑。記於小冊。懷之而返。劉訝之。戲曰。君家亦欲仿此造一樓耶。量之何爲。叟笑而不答。明日晨起。叟仍命劉御之歸。價如前。劉曰。君甫到。未辦一事。那便言旋。叟曰。吾事已了。但歸可矣。遂返。至東門內一火神廟。叟攜襪而入。囑劉候於門外。久之不出。劉自入呼而覓之。道士問其誰。覓劉以叟告。道士笑曰。廟只我與小徒二人。何言叟耶。劉不信。徧搜無跡。俄至大殿。東坐一象。白鬚紅頰。儼然叟也。知爲神。焚香肅拜。方插香於爐。覺有物視之。銀八兩。錢一千。

蓋卽歸途車價及酒貲也。乃爲道士言其神異。未幾聞黃鶴樓火。問其時。卽叟言旋之夕也。於是閔傳樓爲歸德火神所燒。時江夏李小軒方伯方守是郡。聞其事往謁。笑謂神曰。吾爲守於此。忝在同寅。神却焚吾故鄉勝跡。何不稍顧寅誼邪。神覲覲而不能答。

風吹飯甑

桐城方宗屏大令云。康熙某年。其邑大風晝晦。忽有一物落於姚姬傳先生家。聲隆隆然。久之始絕。視之。乃一飯甑。飯已半熟。熱可炙手。上有鐵斧一柄。問之遠近。均無失此物者。知所從來遠矣。乃藏於姚氏宗祠。大令曾親見之。按此事已載惜抱軒文集。並記其年月。俟檢。

鬼以人氣爲滋養品

邵小村中丞爲京卿時。老僕徐某。患疾甚劇。一日。有客謁邵。談次曰。某能見鬼。適見一鬼入君僕室。不知何作。試往訊之。卽入徐某之室。指徐叱曰。若非送京

報老劉乎。徐在牀半跪曰。然。爾以何日死。曰。死已七日。曰。何得擾邵大人管家。笑曰。不敢言之長矣。某前苦頭痛。痛極而睡。睡醒痛止。惘惘出門。不知死也。但覺身輕如葉。足無力。時時欲倒。力行至象坊橋。見一叟偕一少年坐。仆柳下。叟見某。笑謂少年曰。此必新死者。惟弱如此。不十日神氣銷矣。某聞其言。始知已死。卽問叟曰。君輩亦鬼也。何壯健乃爾。叟曰。我得滋養法耳。某曰。旣鬼矣。有何滋養法耶。叟曰。鬼以人氣爲滋養。凡人頭上有紅氣者。富貴人也。白氣者。常人。俱不可近。惟有黃氣者。將與我輩爲鄰。隨之日嗅其氣。體自壯矣。某再拜受教去。見蚩蚩者。類皆白氣。餘氣殊鮮。一日。遇叟遨遊市上。見一少婦。偃僕獨行。頭上果有黃氣。尺許。某大喜。急往隨之。叟搖手止余。某疑其欲獨享也。不顧而馳。伺婦睡時。伏嗅其鼻。婦忽大嚏。某覺身如中杵。突自窗中跌出。適遇大風。便覺此身飄颻空中。旋滾不已。久之。風力漸微。援一枯樹始止。問彼鬼。已至良鄉矣。歸至城門。門神阻我。久之。一馱轎過。始匿於轎底而入。急往覓叟。責其誑。

叟曰。此婦雖不久於人世。而黃氣中隱有金光。必將以節烈死。其氣至剛。那可犯耶。吾阻汝而不聽。乃怨我何也。某乃悟。近游於送報主顧家。至此。見徐某頭上有黃氣。故近之。豈敢擾邵大人耶。客令其速去。鬼曰。某卽去。可囑邵大人速令徐某歸家。遲則不及見其親矣。隨作請安狀而去。問徐毫無所知。乃急遣之。歸家十日始死。

鬼然紙捻爲戲

老伶徐阿四言其少時。以事赴津。行至馬頭。遇雨。宿一逆旅。夜半屋漏。視上房無人。欲移居之。主人不可。強之。主人曰。必欲居此。苟有所見。勿怨我也。徐年少氣盛。立斥其妄而居之。室殊整潔。內室扃閉。乃宿外榻。嫌油燈光黯。自取洋燭爇之。方讀小說未寐。忽見內室門上了鳥自脫。門呀然開。洋燭自滅。几上有所攜紙捻一束。備以吸烟者。忽自然著火。作數十百點。散舞空中。此來彼往。光若長虹。方愕眙驚視。旋化作一輪。向其面前旋轉不已。徐目眩神癡。急跪祝曰。某

年幼無識。觸犯仙居。明日卽行。幸垂憐護。祝已。火條滅。門闔。了鳥自關。燭復自然。徐叩頭謝。吹燈自睡。一夜無他。晨起視紙捻。束置如故。但頭上然去寸許耳。

王家營店中鬼

予友山陰姜耀庭。粵匪亂後。遊幕北來。行至清江王家營。宿一逆旅。室甚清潔。主人款洽殷勤。焚香於鼎。馥郁滿室。乃與僕對榻而臥。時甫四月。方展襪時。蠅蚋出於榻下。怪之。篝燈而睡。三更睡醒。覺身下奇冷。如臥冰雪。又時有奇臭。達於鼻觀。張目視之。見一人背立榻前。以爲僕也。問之不語。突轉其面。則頭顱破裂。血流被肩。方驚訝審視。驀鑽入榻下。急呼僕醒。共起檢察。正見一屍。綑於榻下。血猶涔涔然也。駭不敢聲。始悟主人焚香。蓋欲亂其臭耳。未及天明。卽呼騶去。竟不知死者何人。

鬼役

天津李翰臣夜行於賈家大橋。見二人在前。足距地尺許。蹈空而行。怪而隨之。

至一人家。自門隙而入。方驚訝間。聞室內哭聲作矣。知是鬼役。踉蹌而歸。明日訪之。乃督署輿夫某所居。其母於昨夜病死。

鬼鋸桅

恩叔年大令爲黃河官渡委員時。夜宿舟中。聞船頭有人步履聲。起視無有。舟人口。水鬼也。不足異。夜半睡醒。聞鬼語曰。此船在此可惡。可鋸其桅。便聞衆人邪許。鋸聲隆然。俄聞桅倒觸舟。震震有聲。恩呼衆起視。桅故無恙。舟人笑曰。此亦習見。嘗聞鑿穿船底。漏水有聲。尤可懼也。

鬼冒葛長生

祥符葛秀才長生。美風姿。與其妻某氏。伉儷甚篤。葛年廿二歲。以光緒二年六月中。噎死。後十日。其妻方獨坐哭之。忽見葛披黃紗袍。科頭而入。方驚喜慰問。葛遽擁之求懽。氏拒之曰。幽明路隔。相見無一語。那便爲此。葛擁之益力。正撐拒間。又一葛入。衣飾如前。大怒。叱曰。野鬼何得黷吾婦。便批其頰。鬼頓縮小。入

地而沒。葛視婦悽愴無言。婦攬其裾。空若無物。欸然出戶去。後不復來。

鬼鳴冤頃刻破案

族兄慶好武事。技擊絕人。爲嵩武軍營官時。以急役自奉入都。夜行遇雨。遙見廬舍。臨街一窗。燈火尙明。趨往投宿。方叩門時。燈驟滅。久之。一丈夫出。云無下榻處。堅不肯納。強之。始導至一耳室宿焉。三更許。偶出便旋。忽見一人。頸拖一繩。含淚拱立。知是縊鬼。逐之。入廁邊馬草堆中而滅。返室取刀撥之。見人足焉。祕之。明日將行。突禽丈夫。抽刀加頸。叱曰。殺人賊。草堆中何人也。不速供。卽殺汝以償彼命。丈夫色變。戰栗言曰。某名傅明。爲巡檢司驍卒。頃有一人來避雨。自云黃姓。自榆關來。賈於京師。不知其名。我見其囊重。知有蓄積。遂與妻乘其睡熟勒斃。而取其金。事甫畢。公至。遂置之馬草之下。不虞爲公見也。乃鳴於官。檢驗屍身。與所見無異。頸繩猶未解也。並置於法。

圓煞二則

老僕徐明少時。其甥女年十七。病死。回斂日。家人皆避去。徐曰。嬰嬰少女。死何足畏。屆時伏門屏後竊瞰之。初聞室中什物悉窅有聲。俄見女自戶出。一鬼隨其後。衣飾與差役無異。殊不作牛鬼形。女小步於庭。低徊悽戀。數周後。舉手過額。鬼役鼓氣吹之。女身一轉。再吹再轉。三吹卽旋轉不已。足漸離地。陰風颯起。鬼役隨之。騰空不見。時日雖已沒。庭中尙明。觀之歷歷。

崔季芬軍門弟某。與其妻伉儷甚篤。妻以瘵卒。某悽惋欲絕。回斂日。冀見其魂。乃設供於筵。竊於耳室隔窗窺之。人靜月明。殊無跡響。約及三鼓。忽見一物出靈筵上。峨冠修尾。儼然一雞。噉食供物。狼藉滿几。某潛至靈前。突入擒之。雞驚飛撲地。閣閣而歿。檢視供品。酒脯宛然。殊無啄痕。

鬼召妓

長沙妓薛滿子。色藝冠時。有邑紳王雲將者。與之暱。常來往其家。一日薄暮。薛見俊僕以彩輿來。云王命迎己。遂更衣乘輿。僕騎駿馬隨之而去。旣至。王迓於

門。見之喜曰。我去數日。家人都不在念。但憶卿耳。便相攜入。但見庭中遍懸綵繡。華麗非常。薛陰念渠家不審有何事。張設乃爾。既至廳事。殊無賓客。舊日僕從。亦不復見。惟有向僕與一婢供給使。華服麗姿。目所未覩。薛私訝之。王便命設筵。咄嗟已辦。但肴饌俱冷。物殊不堪食。王使坐已傍。高座大啖。連引數觥。醺然已醉。遂攜之歸寢。被褥華美。繾綣盡歡。交頸而睡。天明睡覺。忽聞人哭泣聲。俄有婦女數輩圍之。訝曰。若非薛滿娘乎。何臥於此。自視乃裸臥棺下。不著一縷。驚起問之。始知王中惡猝斃。死已三日。昨夜值其回煞。家人避去。天曉始歸也。薛乃具述所遭。始悟庭中綵繡。乃幡幢輓幛之屬。所使者芻靈。所食者供饌耳。視其衣飾。俱在棺上。滿子竟無恙。今猶存。此光緒壬寅秋間事。

狎妓遇鬼

鬼設冷香堂事。屢見記載。人多知者。光緒戊戌。一南士偕其友數人。飲於某娼家。夜半。士獨出訪所識妓。至則門庭冷落。殊無一人。至其室。則所暱者。已高臥

矣。士大喜。卽弛衣啓衾而入。甫一入抱。冷如冰雪。驚視其面。腫脹獷惡。乃一屍也。大駭而奔。至其友處。飲猶未散。怪其裸來。問所遭。士具言之。衆大譁。乃同至妓家。則絃索聲繁。客飲正劇。妓則赴他客。召未歸也。愕眙而出。至一糞廠前。其衣在焉。士亦不悟其何緣至此也。

鬼妓侑酒

京師妓女皆以行第稱。曰老一以至老九。獨不曰十。以老小代。皮條營有娼寮曰德魁。其排一。排小者。下驪也。端陽爲債所逼。相約仰藥死。關閉數月。九月始開。一日。羣客夜飲於此。故事。客飲某妓酒。則某妓謂之賣酒。凡同院之妓。俱來小立而去。謂之斟酒。時德魁止有三妓。旣而來斟酒者。乃有五人。客猶未悟。其鴛母驚呼曰。此非老一老小乎。爾死久矣。何又來耶。二妓色驟變。同聲一號。燈燭盡滅。羣客驚散。有跌而破額流血者。後遂封閉。不敢再開矣。

我是鬼

莊子鴻賃上海徐家匯一宅。移入之夕。三更許。皆睡矣。突聞院門室門大聲砰然。一時俱闢。屋瓦擲地。劈拍之聲不絕。炊許始定。莊呼衆起視。門牡微拔。院中止碎瓦一片而已。莊立庭中。厲聲叱問。是人是鬼。聞有應聲出自後院云。我是。是字聲細而長。直至耳邊。始大呼曰鬼。莊驚幾仆。家人亦不敢居。坐話徹曉移去。

鬼戲

予友天門蔣則先學部。寓麻線胡同頴中會館。一日薄暮。乘車自部歸。行至巷口。忽見有人立於兩旁。互牽襟袂。纍纍相屬。有如帷幃。直至南口。不下千百。輿僕皆見之。訝不敢問。驅車穿之而過。至寓後。再出視之。已無覩矣。竟不知其何故也。

鬼妒

王建侯言其戚韓某。娶妻某氏。伉儷甚篤。未朞而死。續娶趙氏女。三朝伴娘偶

出。女方獨坐。忽見一婦啓簾而入。青帔綠裙。舉止嫺雅。貌亦不俗。近嘴角處。有一痣。紅若點脂。手一茶杯。與女笑曰。妹得毋渴乎。女以爲先後宛若也。羞與語。接茶飲之。甫半。聞人聲。婦遽持杯去。俄覺腹中痛如刀刺。更不可忍。延醫視之。云是中毒。女乃具言婦人與茶云云。家中訝無其人。旣言其狀。貌服飾。宛若某氏。知爲前室所祟。衆爲祈禱。卒無效。及夜而死。俗云。醫妒無方。死後自己。若此婦者。死猶不肯已哉。

商陽書局